


CYNGOR TREF PORTHMADOG



COFNODION CYFARFOD BLYNYDDOL MAI 9 2023

Presennol :- Cynghorwyr :- Aled Griffith, John Gwynedd Roberts, Alwyn Gruffydd, Dr Melfyn Edwards, Carol Hayes, Sandra Bodden Jones, Connor Westwood, Llywelyn Rhys(Cadeirydd), Gwilym Jones, Michael Roberts. Llinos Murphy
Marian Roberts (Clerc)

1.5.23 Ymddiheuriadau :- Dim

2.5.23 Adroddiad y Cadeirydd

Dechreuodd y Cadeirydd ei anerchiad drwy ddiolch yn fawr i'r Clerc am y cerdyn cydymdeimlad ar ran y Cyngor Tref a dderbyniodd yn ddiweddar ar achlysur profedigaeth teulu. Roedd yn gwerthfawrogi'n arw ac yn falch o'r ymdeimlad o fod yn rhan o 'deulu' y Cyngor Tref. Dywedodd ei fod wedi bod yn Gadeirydd ers dwy flynedd a'i fod yn ystyried y swydd fel braint ac anrhydedd a bod swydd Cadeirydd yn tipyn mwy o gyfrifoldeb na bod yn Gynghorydd. Nododd bod y Cyngor wedi cyd-dynnu a chyd-weithio yn effeithiol dros y ddwy flynedd diwethaf a bod eleni wedi bod yn haws na'r yllynedd oherwydd nad oedd cymaint o wrthdaro wedi bod ac roedd y Cyngor o'r herwydd wedi medru cyflawni mwy. Roedd yn mynegi ei ddiolch i'r aelodau presennol - yn hen a newydd – ac i'r aelodau sydd wedi gadael y Cyngor dros y ddwy flynedd o'i Gadeiryddiaeth. Roedd yn diolch yn arbennig i Selwyn Griffiths am ei gefnogaeth a'i gydweithrediad fel Is-Gadeirydd yn ystod ei Gadeiryddiaeth. Roedd hefyd yn mynegi ei ddiolch i'r Clerc am ei gwaith dros y cyfnod ac am ei phroffesiynoldeb yn ymdrin â'i swydd. Cyfeiriodd at y ddau Wyl y Banc diweddar a'r prysurdeb ymwelwyr cynyddol ac fel yr oedd hyn yn parhau i roi mwy o bwysau ar wasanaethau lleol.

3.5.23 Ethol Cadeirydd y Cyngor am y flwyddyn 2023/2024

Penderfynwyd yn unfrydol i ethol Cyng Aled Griffith yn Gadeirydd y Cyngor am y flwyddyn 2023/2024 yn ôl cynnig Cyng Alwyn Gruffydd, Cyng Carol Hayes yn eilio.

Cymerodd y Cadeirydd newydd, Cyng Aled Griffith ,y gadair i lywio'r cyfarfod.

4.5.23 Ethol Is-Gadeirydd y Cyngor am y flwyddyn 2023/2024

Penderfynwyd yn unfrydol i ethol Cyng Alwyn Gruffydd yn Is-Gadeirydd y Cyngor am y flwyddyn 2023/2024 yn ôl cynnig Cyng Carol Hayes, Cyng Michael Roberts yn eilio.yn eilio.

5.5.23 Ethol aelodau o'r Pwyllgorau canlynol am y flwyddyn 2023/2024

➤ Pwyllgor Cyllid / Pwyllgor Datblygu ac Eiddo

Penderfynwyd fel a ganlyn ar gyfer Aelodaeth 2023/2024:-

Cadeirydd y Cyngor	-	Cynghorydd Aled Griffith
Is-Gadeirydd y Cyngor	-	Cynghorydd Alwyn Gruffydd
Ward Gest	-	Cynghorydd John Gwynedd Roberts
Ward Ddwyreiniol	-	Cynghorydd Llinos Murphy
Ward Gest	-	Cynghorydd Dr Melfyn Edwards
Ward Ynys Galch	-	Cynghorydd Gwilym Jones
Ward Morfa Bychan	-	Cynghorydd Connor Westwood
Ward Gorllewin	-	Cynghorydd Michael Roberts

➤ **Pwyllgor Staffio : Aelodaeth 2023/2024**

Penderfynwyd :- fel a ganlyn ar gyfer 2023-24 yn ôl cynnig Cyng Alwyn Gruffydd.

Cadeirydd y Cyngor – Cyng. Aled Griffith
Is-Gadeirydd y Cyngor – Cyng. Alwyn Gruffydd
Cyng Gwilym Jones

➤ **Pwyllgor Nadolig : 2023-2024**

Penderfynwyd :- fel a ganlyn:-
Cyng Llinos Murphy
Cyng Sandra Bodden Jones
Cyng John Gwynedd Roberts

6.5.23 Ethol Cynrychiolwyr ar bwyllgorau allanol :

Penderfynwyd :- fel a ganlyn ar gyfer 2023-2024

Is Bwyllgor Harbwr Porthmadog - Cadeirydd y Cyngor Cynghorydd Aled Griffith
Ymddiriedolaeth Rebecca - Cyng. Gwilym Jones
Y Ganolfan - Cyng Sandra Bodden Jones
Amgueddfa Forwrol Porthmadog - Cyng Carol Hayes
Clwb Chwaraeon Madog - Cyng Alwyn Gruffydd
Y Ganolfan Gynghori (Cangen Caernarfon) - Cyng Carol Hayes
Caru Port - Cyng Michael Roberts
Pwyllgor Efeillio - Cyng Alwyn Gruffydd
Pwyllgor Adran Dwyfor (Un Llais Cymru)- Cyng Alwyn Gruffydd
Cyng Gwilym Jones

7.5.23 Dogfennau Rheolaeth (copïau o'r rhai presennol ynghlwm)

Angen ystyried a derbyn y dogfennau isod yn flynyddol.

1. Rheolau Sefydlog
2. Rheolau Ariannol
3. Côd Ymddygiad
4. Archwiliad Mewnol y Cyngor
5. Aseidiadau Risg
6. Cofrestr Asedau
7. Polisi Cynllunio
8. Polisi di-bapur
9. Polisi Iaith
10. Polisi Datganiadau i'r Wasg
11. Cynllun Hyfforddiant

Penderfynwyd :- derbyn a chymeradwyo'r dogfennau i gyd ac i ystyried llunio Polisi Cyfryngau Cymdeithasol. Bydd y Clerc yn ymgynghori ag Un Llais Cymru ynglyn â hyn.

Cofnodion Cyfarfod Rheolaidd y Cyngor Tref Mai 9 2023

Presennol :- Cynghorwyr :- Aled Griffith(Cadeirydd), John Gwynedd Roberts, Alwyn Gruffydd, Dr Melfyn Edwards, Carol Hayes, Sandra Bodden Jones, Connor Westwood, Llywelyn Rhys, Gwilym Jones, Michael Roberts. Llinos Murphy
Marian Roberts (Clerc)

8.5.23 Ymddiheuriadau :- dim

9.5.23 Adroddiad y Cadeirydd.

Roedd y Cadeirydd newydd yn awyddus iawn i gyflwyno ei hun trwy rannu gwybodaeth gefndirol amdano'i hun. Dywedodd fel yr oedd yn byw yn yr ardal ers 25 mlynedd a'i fod yn wreiddiol o Lanbedr, Meirionnydd. Mae'n dad i dri o blant – 2 yn y Coleg a'r llall yn Ysgol Eifionydd - a chafodd brofedigaeth bron i ddwy flynedd yn ôl o golli ei wraig, Sian. Mae wedi bod ar Fwrdd Llywodraethwyr Ysgol y Gorlan ers 11 mlynedd; wedi bod yn arwain elusen Tremadog 200; wedi bod yn drysorydd Clwb Peldroed Ieuenctid Llanystumdwy ers 12 mlynedd ac wedi bod yn Gynghorydd Tref dros Ward Tremadog ers 2019. Roedd yn ddiolchgar iawn i gael ei ethol yn Gadeirydd ac yn edrych ymlaen i'r ddwy flynedd nesaf yn y swydd.

10.5.23 Cadarnhau cywirdeb cofnodion :-

Cyfarfod Rheolaidd Pwyllgor Llawn Ebrill 11 2023

Cafwyd yn gywir yn ôl cynnig Cyng Alwyn Gruffydd, Cyng John Gwynedd Roberts yn eilio.

Cyfarfod Is-Bwyllgor Cyllid ac Eiddo Ebrill 25 2023

Cafwyd yn gywir yn ôl cynnig Cyng Dr Melfyn Edwards, Cyng Gwilym Jones yn eilio.

11.5.23 Cyfle i'r Cynghorwyr ddatgan diddordeb.

Cyng Aled Griffith – mater 16.5.23

MATERION I'W DWYN GERBRON :-

Gadawodd y Clerc yr adeilad ac aeth y cyfarfod yn gaëedig.

12.5.23 Cymeradwyo penderfyniad yr Is-Bwyllgor Cyllid ac Eiddo 25.4.23 i godi gris cyflog y Clerc o 25 i 27 ar raddfa NALC – o £16.54 i £17.58 yr awr.

Aeth y cyfarfod yn agored a dychwelodd y Clerc i'r cyfarfod i gofnodi penderfyniad y Cyngor i gymeradwyo penderfyniad yr Is-Bwyllgor Cyllid ac Eiddo 25.4.23.

13.5.23 Cyng Aled Griffith :- cynnig holi Steffan Jones am gynnydd datblygiadau'r Golff Bach.

Mynegwyd siom gan y Cyngor Tref am nad oedd dim gwaith wedi ei wneud gan Gyngor Gwynedd i wella cyflwr y parc er i Steffan Jones, Pennaeth Adran Priffyrdd a Bwrdeisdrefol Cyngor Gwynedd, restru llu o welliannau ar ei gyfer pan ddaeth i annerch y Cyngor Tref ynglyn â'r cynlluniau arfaethedig yng nghyfarfod mis Mawrth eleni.

Penderfynwyd :- ysgrifennu at Steffan Jones i fynegi anfodlonrwydd y Cyngor Tref am y sefyllfa gan yrru copi hefyd i'r Prif Weithredwr gan gynnwys copi o Gofnodion cyfarfod 14.3.23 ble ceir amlinelliad o gynlluniau arfaethedig Cyngor Gwynedd ar gyfer y parc yn ôl cynnig Cyng Gwilym Jones, Cyng John Gwynedd Roberts yn eilio.

14.5.23 Cyng Llywelyn Rhys :- cynnig holi'r awdurdodau am arwyddion anghywir a charmarweiniol ar hyd llwybr Carreg Samson. (Gweler lluniau)

Nodwyd nad oedd y ffordd yma yn un breifat ond yn hytrach yn rhan o rwydwaith Llwybrau Cyhoeddus Gwynedd. Cytunwyd felly na ddylai trigolion y tai cyfagos osod arwyddion uniaith Saesneg yn mynegi i'r gwrthwyneb.

Penderfynwyd :- gweithredu ar y cynnig gan fynegi yn gryf wrthwynebiadau'r Cyngor Tref i'r arwyddion uniaith Saesneg camarweiniol yn ôl cynnig Cyng Llywelyn Rhys, Cyng Carol Hayes yn eilio.

15.5.23 Cyng Llywelyn Rhys :- cadarnhau cyfraniad Cyngor Tref Porthmadog i ddathliadau Eisteddfod Genedlaethol 2023.

Trafodwyd mater 22.5.23 yn ogystal yma. Cafwyd trafodaeth hir ynglyn â phwysigrwydd addurno'r dref ar gyfer wythnos yr Eisteddfod Genedlaethol ym Moduan eleni. Cytunwyd fod yr amser yn brin erbyn hyn a bod yn rhaid gweithredu yn fuan iawn er mwyn sicrhau sioe deilwng.

Penderfynwyd ar y camau canlynol :-

- Ail-gysylltu â Swyddfa'r Eisteddfod i'w atgoffa o'r cyfraniad ariannol sylweddol gan y Cyngor Tref ; i gydnabod pwysigrwydd yr Eisteddfod i'r Cyngor ac i'r ardal leol ac i gydnabod gwaith caled y Pwyllgor Apêl Lleol yn eu gwaith diflino i godi arian i'r Eisteddfod;
- Ail-gysylltu ag ysgolion cynradd lleol a C.F.F.I Dyffryn Madog i ddarganfod beth allent ei gyfrannu i addurno'r dref;
- Holi J.R.Electrics am bris gosod baneri Cymru ar bolion y tu allan i siopau'r dref;
- Codi Is-bwyllgor ar gyfer cydlynu syniadau a rhannu cyfrifoldebau.

Cytunodd y Cyngorwyr Aled Griffith, Carol Hayes, John Gwynedd Roberts Dr Melfyn Edwards a Michael Roberts i fod ar yr Is-bwyllgor a bydd y Clerc yn trefnu cyfarfod yn yr wythnos nesaf er mwyn gweithredu yn fuan.

16.5.23 Cyng Aled Griffith :- cynnig gyrru llythyr ar ran y Cyngor Tref i Senedd Cymru / Chwaraeon Cymru / AS / Cyngorau eraill Gogledd Cymru i bwysu i ddatblygu pwll nofio cystadleuol 50m yng Ngogledd Cymru.

Clywyd am y diffyg cyfleoedd i ymarfer nofio cystadleuol yn lleol. Nodwyd mai dim ond 2 bwll nofio o safon Olympaidd sydd yng Nghymru – un yng Nghaerdydd a'r llall yn Abertawe. Y pwll Olympaidd agosaf i ardal Porthmadog yw Stockport neu Lerpwl.

Penderfynwyd :- gweithredu ar gynnig Cyng Aled Griffith, Cyng Dr Melfyn Edwards yn eilio.

17.5.23 Cyng Llinos Murphy :- Cynnig cynnal cyfarfod gyhoeddus yn Y Ganolfan a gwahodd rhywun o Gyngor Gwynedd i ddod i drafod beth fyddai cynllun Trwydded Parcio Trigolion yn ei olygu i drigolion Porthmadog cyn parhau efo'r syniad. (Bydd angen cofnodi enwau etc ar y noson a pha strydoedd sydd efo diddordeb.)

Trafodwyd cynnwys gohebiaeth 10 oddiwrth Iwan ap Trefor(cofnod 34.5.23) lle mae'n awgrymu rhannu'r dref i 2 gynllun 1 – East Avenue; Heol Newydd a Stryd Glaslyn a 2 - Heol yr Wyddfa; Heol Fadog a Stryd Wesla. Cytunwyd fod angen gweithredu i wella problem parcio yn y dref ond bod angen profi barn trigolion lleol yn gyntaf cyn symud ymlaen.

Penderfynwyd :- y byddai Cyng Llinos Murphy yn trefnu cyfarfod cyhoeddus i drigolion Cynllun 1 – East Avenue; Heol Newydd a Stryd Glaslyn i wyntyllu barn y trigolion ar y mater cyn symud ymlaen i weithio gyda Chyngor Gwynedd i lythyru trigolion y strydoedd yma yn ôl cynnig Cyng Llinos Murphy, Cyng Dr Melfyn Edwards yn eilio.

18.5.23 Cyng Gwilym Jones :- cynnig peidio a gwrthwynebu gosod llinellau melyn ar ddwy ochr cyffordd Marine Terrace a'r Garth.

Penderfynwyd :- gweithredu ar gynnig Cyng Gwilym Jones, Cyng Llywelyn Rhys yn eilio.

19.5.23 Cyng Carol Hayes :- Cynnig bod Cyngor Tref Porthmadog yn gwrthwynebu unrhyw ymgais i gynnal seremoni arwisgo i William (mab y brenin Charles III) yng Ngwynedd neu mewn unrhyw diriogaeth Gymreig arall.

Penderfynwyd :- gweithredu ar gynnig Cyng Carol Hayes a dileu geiriau olaf y frawddeg "yng Ngwynedd neu mewn unrhyw diriogaeth Gymreig arall.", Cyng Llywelyn Rhys yn eilio.

20.5.23 Cyng Aled Griffith :- cynnig ysgrifennu i Gyngor Gwynedd i holi beth yw eu cynlluniau

am fuddsoddi mewn unedau newydd ar stâd ddiwydiannol Penamser a holi perchennog y tir tu ôl i Garej Carafannau Hamdden beth yw eu cynlluniau ar gyfer y tir yma.

Nodwyd mai Llywodraeth Cymru sydd berchen y tir yma ers ei brynu ar gyfer ei ddatblygu yn y gorffennol ac nad oedd dim wedi ei wneud iddo ers y pryniant.

Penderfynwyd :- ysgrifennu at Lywodraeth Cymru i holi beth yw eu cynlluniau ar gyfer y tir yma yn ôl cynnig Cyng Aled Griffith, Cyng Sandra Bodden Jones yn eilio.

21.5.23 Cyng Dr Melfyn Edwards :- cynnig holi perchennog tir Garreg Wen ynglyn â'r 'dympio' sbwriel ar ben llwybr Uwchllyn.

Penderfynwyd :- cyfeirio'r mater i sylw Gwenan Mai Roberts, o Adran Niwsans Sŵn a Llygredd Cyngor Gwynedd yn ôl cynnig Cyng Dr Melfyn Edwards, Cyng Gwilym Jones yn eilio.

22.5.23 Cyng Aled Griffith :- cynnig prynu baneri Cymru a gofyn am bris gan R.J.Electrics i'w gosod ar y polion sydd y tu allan i siopau'r dref.

Trafodwyd yr eitem yma ar y cyd â 15.5.23.

23.5.23. Materion i'w dwyn gerbron y Cadeirydd unai er gwybodaeth neu i'w rhoi ar y Rhaglen ar gyfer y cyfarfod nesaf. Dyddiad cau Rhaglen Mehefin 13 2023 = Mehefin 3 2023 , (Rheolau Sefydlog 8.1 " o leiaf deg diwrnod cyn cyfarfod y Cyngor".)

- **Cyng Dr Melfyn Edwards** :- cynnig gofyn am ddiweddariad ar sefyllfa addurno'r dref ar gyfer yr Eisteddfod.

24.5.23 Gohebiaeth : Rhestr Aros am Ateb (copi ynghlwm).

Penderfynwyd :- dileu y 2 llythyr cyntaf oddiar y rhestr.

Mynegwyd anfodlonrwydd na chafwyd ateb i'r llythyrau ynglyn â'r 'dympio' a'r llygru sydd yn digwydd ar gors Borth y Gest.

Penderfynwyd :- ysgrifennu at y Prif Weithredwr i gwyno am y diffyg gweithredu ac i fygwth mynd â'r mater i'r Wasg os na dderbynnir ymateb ganddo o fewn pythefnos yn ôl cynnig Cyng John Gwynedd Roberts, Cyng Gwilym Jones yn eilio.

Gan fod cymaint o llythyrau yn aros am ymateb **penderfynwyd** :- bod y Clerc yn ail – yrru pob llythyr na chafwyd ymateb iddo ar ôl 2 fis.

GOHEBIAETH :

25.5.23 ANDREW OUGHTON, Cyfeillion Ysbyty Alltwn

Penderfynwyd :- derbyn y wybodaeth ac ysgrifennu llythyr o gefnogaeth a llythyr at Mabon ap Gwynfor yn datgan pryderon y Cyngor yn ôl cynnig Cyng Dr Melfyn Edwards, Cyng Gwilym Jones yn eilio.

26.5.23 ANN HOPCYN, O Law i Law – Caernarfon

Penderfynwyd :- derbyn y wybodaeth a diolch iddynt am y wybodaeth ond gwrthod y cynnig i gyfarfod.

27.5.23 PETER SIMPSON, Hwb Tîm Tacluso Ardal Ni

Penderfynwyd :- derbyn y wybodaeth

28.5.23 HYWYN WILLIAMS, Astudiaeth achos derbyn grant Partneriaethau Natur Lleol a chopi o'r Astudiaeth Achos (Copi electronig 7 tudalen yn unig)

Penderfynwyd :- derbyn y wybodaeth

29.5.23 UN LLAIS CYMRU, Rheolau Sefydlog

Penderfynwyd :- derbyn y wybodaeth

30.5.23 ELUNED MORGAN I MABON AP GWYNFOR, Meddygfa Porthmadog

Penderfynwyd :- derbyn y wybodaeth

31.5.23 CYNGOR GWYNEDD, Holiadur Perfformiad Cyngor Gwynedd

Penderfynwyd :- derbyn y wybodaeth a phob aelod i ymateb i'r holiadur yn unigol yn ôl cynnig Cyng Llywelyn Rhys, Cyng Carol Hayes yn eilio.

32.5.23 BLEDDYN RHYS, Adroddiad Archwiliad Mewnol 2022-2023

Penderfynwyd :- derbyn y wybodaeth

33.5.23 BLEDDYN RHYS, Ffurflen Flynyddol Archwiliad 2022-2023

Penderfynwyd :- derbyn y wybodaeth

34.5.23 IWAN AP TREFOR, Ymateb i 377.4.23 Cynllun Parcio Trigolion

Trafodwyd y mater eisoes yn 17.5.23.

35.5.23 BLACK ROCK BEACH CLUB, Ymateb i 376.4.23 cais am arwyddion dwy-ieithog

Roedd y Cyngor Tref yn gwerthfawrogi'r ffaith iddynt dderbyn ymateb dwy-ieithog yn ôl gan reolwr y sefydliad ond yn parhau i ofidio fod y perchennog wedi newid enw'r safle o'r Glanaber i enw Saesneg nad oedd yn rhoi unrhyw synwyr o leoliad y lle.

Penderfynwyd :- ysgrifennu'n ôl i fynegi'r uchod ac i ofyn yn garedig iddynt ail-ystyried enw'r dafarn a defnyddio'r enw gwreiddiol ac i'w cyfeirio at wefan Comisiynydd y Gymraeg lle cynigir cyngor ac arweiniad i fusnesau yn ôl cynnig Cyng Alwyn Gruffydd, Cyng Michael Roberts yn eilio.

36.5.23 ELGAN ROBERTS, Ymateb i 378.4.23 – mainc Glenda Burke

Penderfynwyd :- ysgrifennu'n ôl at Elgan Roberts i ddiolch yn fawr iawn iddo ac i dderbyn ei gynig caredig yn rhoi ei wasanaeth am ddim i atgyweirio mainc Goffa Glenda Burke, yn ôl cynnig Cyng Llywelyn Rhys, Cyng Michael Robeerts yn eilio.

37.5.23 UN LLAIS CYMRU, Cynigion ar gyfer Cyfarfod Cyffredinol 2023

Penderfynwyd :- derbyn y wybodaeth a gadael y mater ar y bwrdd tan y cyfarfod nesaf ar 13.6.23.

38.5.23 Trafodwyd y lluniau o leoliadau posibl i osod bwrdd gwybodaeth ar y Garth a cytunwyd fod y ffordd yn un beryglus i osod unrhyw beth allai dynnu sylw neu greu rhwystr ar y ffordd.

Penderfynwyd :- holi Cyngor Gwynedd am leoliad addas ar hyd y ffordd yma.

39.5.23 MATERION ARIANNOL :

Derbyniadau :

CAE PAWB	Rhent 2023-24	£ 770.00
H.S.B.C.	Llog Banc Mawrth – Ebrill 2023	£ 37.64
CYNGOR GWYNEDD	Praesept – Taliad 1	£ 31,290.71
H.M.R.C.	Ad-daliad TAW 2022-23	£ 6,471.61

Awdurdodwyd y taliadau canlynol yn ôl cynnig Cyng Alwyn Gruffydd, Cyng Dr Melfyn Edwards yn eilio:-

1	Marian Roberts	LLinell Ffôn a Wê Ebrill 2023	£ 65.17
---	----------------	-------------------------------	---------

2	Marian Roberts	Cyflog Clerc Ebrill 2023	£ 922.97
3	Marian Roberts	Lwfans blynyddol rhedeg swyddfa	£ 300.00
4	Cyllid a Thollau ei Mawrhydi	Treth Incwm cyflog Clerc Ebrill 2023	£ 230.74
5	Marian Roberts	Ad-daliad am 16 stamp ail ddsbarth	£ 12.00
6	Marian Roberts	Ad-daliad am Inc du	£ 19.59
7	B.H.I.B.	Primiwm Yswiriant 2023-2024	£ 1,541.92
8	Y Ganolfan	Cyfarfodydd mis Ebrill	£ 60.00
9	Marian Roberts	Ad-daliad am 2 faner Draig Goch a 2 faner Dewi Sant gan Cadwyn Cyf ar gyfer cylchdro Bodawen	£ 23.75
10	Gardencraft	Llenwi tybiau blodau'r Stryd Fawr	£ 120.00
11	Criccieth Cleaning	Glanhau llochesi bws	£ 201.60

(Mae copi o bob sic ar gael i'w harchwilio ar gyfer awdit/rheolau ariannol)

40.5.23 Cyfrifon 2022-2023

Derbyn a chymeradwyo Adroddiad yr Archwilydd Mewnol a Ffurflen Flynyddol 2022-2023

(copi ymghlwm - gohebiaeth 7 ac 8)

Penderfynwyd :- derbyn y wybodaeth a chymeradwyo Adroddiad yr Archwilydd Mewnol a Ffurflen Flynyddol 2022-2023 yn ôl cynnig Cyng Alwyn Gruffydd, Cyng Gwilym Jones yn eilio.

41.5.23 CEISIADAU CYNLLUNIO

(a) Rhif Cais .: C23/0330/44/DT (wedi ebostio i'ch sylw 20.4.23)

Lleoliad : 14 Tan Y Foel, Borth Y Gest, Porthmadog, Gwynedd, LL49 9UE

Bwriad: Porth newydd i'r ochr, trosi modurdy i ystafelloedd byw gan gynnwys to wedi ei insiwleiddio newydd, estyniad unllawr i'r cefn, storfa o bren i'r cefn ac ardal decin wedi ei godi gyda lle storio oddi tano

Penderfynwyd :- Dim gwrthwynebiad yn ôl cynnig Cyng Llywelyn Rhys, Cyng Dr Melfyn Edwards yn eilio.

Daeth y cyfarfod i ben am 21.10

Marian Roberts
(Clerc)
11.5.23